

寧國府志卷之十

直隸寧國府知府任丘黎晨校刊

雜紀

乾道變化大矣哉錯乎不能以一端求也故其懸象著明氤氲鼓盪發爲禎祥瘕爲災沴其在物也異端僊釋曲說技藝金石魚蟲草木之異神奇怪變們倏恍惚其孰能窮之夫易贊知來傳稱博物予觀古良史考五行順逆傳日者醫農而下其亦典載之不可廢者歟寧國分野入斗十六度壤地

寧國府志卷十

一

雖小其人事災祥有足書者予故舉所常見聞究造化之變別爲雜紀一篇

黃帝與容成子遊於黃山遇浮丘公授以還丹一日見珠函玉壺自空而下啓之中有霞衣寶冠珠履瓊漿甘露帝乃受而服之遂從望僊峯上昇至

今有軒轅浮丘容成三峯

出周書異記

後漢永和四年七月壬午熒惑入南斗犯第三星次年丹陽賊周生馬勉等起兵攻沒郡縣

涇川隱士琴高有道術入水不濡嘗遊冀州涿郡

二百餘年辭入涿水他日乘赤鯉而昇其弟子見之

建安中大帝在豫章丹陽有星變劉惇曰客勝主人某日賊當得時邊鴻作亂卒如惇言

吳太元四年涇人陳焦死埋六日更生穿土而出舊經云焦爲涇邑長有異政及終於官塋後七日化爲小兒坐墓上久而方滅

赤烏七年秋宛陵嘉禾生

赤烏十三年八月故鄣寧國諸山崩鴻水溢

晉竇子明爲陵陽令號陵陽子明後避劉聰之亂棄官學道於棲真山邂逅一隱者引與爲友或曰卽滕公也後皆僊去

東晉時宣城有物大如水牛灰色卑脚脚類象曾前尾上皆白大刀而遲鈍來至城下衆咸異之太守殷祐令郭璞占之遇遯之蠱其繇曰艮體連乾其物巨山潛之畜匪兇匪虎身與鬼并精見二午法當爲禽兩靈不許遂被一創還其本墅按卦名之是爲驢鼠卜適畢仗者以戟刺之深尺餘遂去

不復見時郡綱紀上祠請殺之巫云神廟不悅曰
此是鄭亭驢山君鼠使詣荆山暫來過我不須觸
之一如卜言

永和元年二月春穀民獲金券一枚長五寸狀如
鐵券明年桓温平蜀廬江太守路永上言春穀城
北岸水有紫赤光取之得金狀如斗遣主簿李邁
表送于朝

咸和元年十月宣城春穀縣岸崩獲石鼎重二十
斤受斛餘

太和中春穀獻白兔

劉宋元嘉十六年宣城宛陵野蠶成繭大如鷄卵
彌漫林谷次年轉盛

魏長史自江右載豆來宣城忽有梓木並舟而行
夜夢神告曰我錢塘梓府君也欲托祠於昭亭山
既而舟至其處魏度山麓宜爲神居然無以得材
復夢神曰宣人方病目舟中豆可療試之無不驗
者得錢既多祠遂成

大明三年春甘露降白龜見五月宛陵石亭山野

蠶三百餘里

泰始二年八月於赭圻城南春穀舊治得紫玉一段圍

三尺二寸長一尺厚七寸太守攻爲爵以獻文武

二廟

齊永明中宣城白鹿見

梁天監元年蕭琛爲宣城太守時有北僧南度惟齋一葫蘆中有漢書序傳僧曰三輔舊老相傳以爲班固真本琛因求得之其書多異今者紙墨亦古文字如龍舉之例非隸非篆琛甚秘之

隋宣城令張路斯夫人生九子嘗釣于焦氏臺一日見釣處有宮殿遂入居之自是歸輒體寒而濕問其故曰我龍也蓼人鄭遠祥亦龍也與我爭此居明日當戰使諸子助我我領絳綃而鄭領青綃明日九子射中青綃者后九子皆化爲龍按唐布衣趙畊

之說如此歐陽永叔集古錄有龍公碑蘇子瞻亦爲之記

唐時宣州嘗進開樣紅線毯及紫毫筆白居易紀之以歌歌曰紅線毯擇蠶繰絲清水煮揀絲揀線紅藍染染爲紅線紅於藍織作披香殿上毯披香

殿廣十丈餘紅線織成可殿鋪綵絲茸茸香拂拂
綿軟花虛不勝物美人踏上歌舞來羅襪綉鞋隨
步沒太原毯澁毳縷硬蜀都褥薄錦花冷不如此
毯温且柔年年十月來宣州宣州太守加樣織自
謂爲臣能竭力百夫同檐進宮闈線厚絲多捲不
得宣城太守知不知一丈線毯千兩絲地不知寒
人要煖少奪人衣作地衣又曰紫毫筆尖如錐兮
利如刀江南石上有老兔喫竹飲泉生紫毫宣城
之人采爲筆千萬毛中揀一毫毫雖輕功甚重管

勒工名歲克貢君兮臣兮勿輕用勿輕用將何如
願賜東西府御史願頒左右臺起居搦管趨入黃
金闕抽毫立在白玉除臣有姦邪正衙奏君有動
言直筆書起居郎侍御史爾知紫毫不易致每歲
宣城進筆時紫毫之價如金貴慎勿空將彈失儀
慎勿空將錄制詞

貞元十七年南陵縣丞李嶷死殯三十日而甦

太和間南陵人蘇仲芳父死負土築墳廬墓側者三
年終日遶墳行哭羣鳥常隨之哀鳴忽有祥雲覆

墓瑞草蔓生鄉人勸之歸不聽乃棄俗爲僧有戒行數年跌坐而化

大中間刺史裴休建廣教寺其材皆松蘿惟安南有之相傳爲黃蘗禪師所募時寺後有二金鷄相鬪入井中材皆從井中出寺成餘松蘿八株蘗師植之殿前輒敷榮長茂別有栢二株遇僧有異行者輒開異花數色今井中斷木尚存

咸通十一年有異鳥極大四目三足鳴山林其聲曰羅平占曰有兵人相食

中和二年麻衣禪師煉藥於黃山翠微峰下身衣麻衣得其麻縷者輒能療病

宋張果知宣州夜夢神人告曰我陵陽山上神也明日午有大水漂沒城郭公可去橫澗若遇老人宜丐免之次日公抱州籍至澗果一老人橫笛乘牛而來水亦暴至懇告弗答至再乃問何以知之公具以實告老人曰我奉上帝令不敢違公以不得請遂抱册入水城得不沒未幾册載一靴浮至城北鐵冶里而止郡人因求公屍具衣衾葬焉

涇樵人於古井中得銅量識者謂漢時所鑄納之
府庫夜有光如火移置宣城玄妙觀光乃息又有
銅鐘沂流而上玄妙道流得之鐘上有銘乃唐天
寶溧水香林觀中物也其音特異後爲雷所擊
建炎庚戌叛寇圍城甚急忽有神龍見爪角于城
南其長逾尺衆異之知州李光祝之已而賊砲反
擊賊氣遂沮諸將皆驚曰此護城三聖也其神長
曰賀息次曰遊奕少曰金甲昔嘗出戰見之必勝
光因立祠祀之

紹興初南陵脩大農陂主簿臧姓者督夫丁開港
至新溝掘得一棺中有石刻云易上吉蒼卜凶五
百年水大通若遇臧主簿移我上高峯臧遂移葬
于分界山

紹興中余端禮爲寧國尉會歲旱禱于沈大聖祠
方齋夢神曰公後大貴當爲公一雨旣寤晨詣祠
祝曰夜夢果不謬請飾神祠湏臾大雨霑足公後
帥金陵夢神來謁乃捐緡錢二百萬爲飾祠費
寧國僧宗杲姓奚氏少入山東惠雲寺爲苾芻宣

和六年叅園悟師於汴無他語但云薰風自南來
殿閣生微涼遂悟嘗與呂左丞張魏公張橫浦談
辨出入儒釋排闥不窮數子多悅之後坐九成黨
竄梅州一夕太守及市民皆夢定光佛入城明日
果至孝宗聞其名召對稱旨賜號大慧禪師所著
有正法眼藏三卷語錄三十卷
元宣城玄妙觀道士賀士迪有道行善祈禳禦菑
患太宗嘗召至京師賜號真人并寶劍玉鼎玉環
玉圭各一楮幣萬緡年七十乘傳還山卒

太平張松谷隱于黃山芙蓉峯下辟穀煉形嘗採
藥治療人疾歲旱禱雨輒應遠近慕之大德庚子
忽索紙筆書偈云鐵牛鞭向四禪天金身已寄蓮
花座書畢坐逝

至元中涇人胡有慶爲婺源令時三虎入城有慶
親發三矢悉斃之貫學士爲作射虎行云着鞭掣
電馬如洗血染曉山青不得山虎已亡路虎存安
得一箭無踪跡

至順元年七月寧國諸路大水沒田一萬三千五

百頃

至正十五年宣州大旱米升銀二錢

國朝洪武二年四月宣城民間產瑞麥獻於朝

弘治十四年宣城大水漂没圩岸

正德三年大旱道殣相望

正德五年宣城大水諸圩破蕩殆盡人畜溺死不

可勝計

嘉靖元年太平大饑黃山竹生米民爭採食之

嘉靖八年秋宣城諸山蛟發漂没民居甚衆水溢

入城至軍儲倉倉浸數尺

嘉靖十年飛蝗食禾稼

寧國府志卷之十 終

聽缺吏徐經錄稿

吳縣計文卿謄真

上元段輝等刊刻